

四庫全書

集部

欽定四庫全書

集部

懷麓堂集卷八十六至

詳校官監察御史<sub>臣</sub>范衷

中書<sub>臣</sub>劉源溥覆勘

總校官編修<sub>臣</sub>王燕緒

校對官待詔<sub>臣</sub>胡士震

謄錄監生<sub>臣</sub>趙應欽

欽定四庫全書

懷麓堂集卷八十六

明 李東陽 撰

文後稿二十六

誌銘

明故太傅兼太子太傅平江伯陳公墓誌銘

公姓陳氏諱銳字志堅其先自潁川徙廬之合肥高祖諱聞元季以鄉兵內附從高皇帝下江南累功至成都

衛指揮同知曾祖諱瑄累功至右軍都僉事從文皇帝  
靖難封奉天翊運宣力武臣特進榮祿大夫柱國平江  
伯總督漕運議罷海漕通濟寧運河功最多命子孫世  
襲賜誥券追贈三代卒贈平江侯謚恭襄勅有司廟祀  
清江浦祖諱佐代早卒考諱豫正統間以平福建叛賊  
功進封侯再贈三代景泰間城臨清守備南京再鎮臨  
清卒贈黔國公謚莊敏仍勅有司即其地廟祀之黔國  
之卒也公方奉太夫人某氏居南都奔喪歸葬乃襲封

時天順甲申歲也成化乙酉憲廟知其才命領三千營  
分司轉奮武營兼領禁衛賜蟒衣鎧甲諸物戊子太夫  
人喪予告歸葬庚寅佩征蠻將軍印總鎮兩廣號令明  
肅前後勦蠻賊三千餘級俘賊黨及還所掠者倍之賜  
勅獎諭名益起會漕帥闕移鎮淮揚增拓濟寧諸牐修  
淮安二衛城及高郵諸湖堤構屋數百間以居貧民歲  
大疫遣醫分療給米千餘石為廩所活甚衆死者以官  
地瘞之武官新襲者遣入儒學給以筆札生儒應試者

具官舟資送之部領有疾躬往撫視漕卒餘丁出應公役請予之糧越十有三年條具便宜事百餘疏多見施行嘗言通州至都城恒困陸輓請因元會通河舊蹟浚河增牒以通運舟功甫就緒舟果有至者上遣中使勞以羊酒有不便者造浮言沮之遂罷其役既而命掌南京中軍都督府事弘治戊申今皇帝召入督神機營兵為掌左軍都督府轉五軍營簡教有則恩威並著甲寅河決張秋公與太監李公興副都御史劉公大夏奉命

往治乃於上流塞黃陵岡荆隆口下則治滎澤孫家渡  
諸河七十餘里浚祥符四府營游河四十餘里俾諸水  
由歸德武平出宿遷小河口以達於淮疏賈魯河由曹  
縣梁進口以出徐州於是張秋決塞而運河始復其舊  
上賜名安平鎮遣行人勞以銀帛加公太子太保比還  
朝加太保兼太子太傅增歲祿二百石丙辰加太傅兼  
秩如故公請以所加秩重贈三代而黔國追賜號為奉  
天翊衛推誠宣力武臣特進光祿大夫柱國皆異數也

庚申敵犯大同急命公佩靖北將軍印統京營及諸路  
兵馬出討之許以便宜行事時公病在告久聞警即  
出朝力疾以往至則夙夜祇慎嚴為部曲期以全制勝  
而精力已弗逮矣越數月召還蓋居閒二年而卒是為  
壬戌十二月十五日壽六十有四上輟視朝一日遣官  
諭祭者七皇太子遣祭者一配沐夫人先卒已賜葬於  
江寧太山祖墓之次命有司啟壙窆公而夫人祔焉公  
性坦亮器度甚偉論疊疊不竭高自負抱過事必為宏



網闊制不斤斤徇束縛所至有能聲兵戎之外歷試累  
效若親王冊封皇太子冠皆預禮修皇陵都城建禮部  
皆董其役惟漕河事尤勞且久會通之議垂成而罷而  
安平竟底成績蓋其誦究區畫得諸家範者為多兼尚  
文事通書史攻詩翰禮重喪祭撫庶弟鐸鎡及諸妹孥  
從皆為婚嫁分所得祿以給族黨故舊窮乏者亦調之  
好賢下士善遇官屬與人重然諾女許嫁周駙馬子庠  
庠忽遘疾幾殆周請公停婚公義不可人以是多之沐

氏乃黔寧時靖王之孫無子子一熊出袁氏錦衣勲衛  
未請封女四孫女一公引發有日其中表弟譚公祐狀  
公行以熊來請銘予以成國朱公之故獲聯姻戚因慨  
念名家宿將之遺風聖天子用舊保終之盛德皆不可  
遂泯乃叙次其事而系以銘銘曰國有列爵家有世臣  
孰開孰承惟視其人我明奮興羣策竝屈桓桓平江代  
有勲閥粵自聖祖逮於神宗中最著者恭襄之功恭襄  
有孫黔國有子人曰公才必復其始入學於師朝詩暮

書出練於戎左折右文替纓翹翹朝著之望閭幄嚴嚴  
干城之將南巡嶺徼虎旅成羣入領漕司萬艦如雲居  
重馭輕本兵斯寄帝曰汝才實任予事染堙障狂人曰  
公能有河會通有鎮安平彼胡陸梁公起授鉞載驅載  
歸盡瘁而沒帝曰汝心王室是於終則未究始乃有餘  
祭有備物葬有成武帝曰汝勞恩豈予惜鍾山在南下  
有高原祖考所在公歸其間難有苟避公我勿屑功有  
偽增公我寧闕持此校彼孰劣孰優公身雖亡志則未

休舒華振英公子亦肖為表為箕公有遺教公業斯存  
公子公孫有徵後來其在公門

明故奉政大夫修正庶尹雲南按察司僉事致仕  
何公墓誌銘

郴州何公廷彥以雲南按察司僉事致仕歸十有八年  
卒於家其長孫孟春承重當終制乃具哀經請於予曰  
孟春既喪吾父又喪吾祖孤不克自立惟先生嘗為吾  
父銘顧於吾祖尤舊故宜無所復靳意者亦吾祖意也

言未畢涕泗交下跼弗能起予甚悲之乃據其所自為  
狀以銘公諱俊廷彥字也少從父宦遊於外比歸悉以  
資業讓諸兄力紹家學學且就授徒為養養嫡母袁及  
母鄧以孝聞屢試勿售天順壬午舉湖廣鄉貢成化己  
丑登進士第時年已四十有三癸巳授南京戶部主事  
丁鄧安人憂丙申復任凡所領錢穀出納明辨而以廉  
慎將之稱能官者必指屈焉辛丑擢雲南按察司僉事  
兼督雲貴學校徃復勤勵不避險遠其為教令隨俗導

化濟之以嚴凡所陶鑄多中器使初公以晚達無意進  
取為按察時其子說已以解元登進士遂慨然思歸然  
未即遂居四年丙午乃得請去弘治戊申說為刑部主  
事值今天子登極恩當封公例以本秩進階奉政大夫  
修正庶尹後孟春又登進士累官兵部員外郎署郎中  
公猶及見之而卒年七十有七矣公性開朗畦町不內  
設與人交必從厚聞有善雖細輒加獎借見窮乏危急  
則周之或背讒而毀者置而不問藹然有前輩長者之

風既謝事無他嗜好獨嗜醫富畜方藥每手製以施病者徃徃而效專家者顧弗逮焉所著有訥齋稿十卷配廖氏同郡名家女有懿範為嫺黨所歸年四十有二而卒贈安人後加贈宜人繼李氏累封宜人子三說長而賢其卒也時論惜之次言次閭孫亦三孟春文思奇敏蒞事有賢俊聲次孟旦次全孫公生宣德某年卒以弘治某年葬於某山之原公先世在宋出廬陵徙廣東宋有號都統者鎮郴桂其孫行三九者始居郴郴今有都

統廟族人皆稱為始祖公曾祖諱德翁篤行好義祖諱  
仁海世隱不仕考諱義堅舉鄉貢累官合州同知憲政  
在人公用家學取進士且以教四方學者如瑞州陳侍  
郎政王御史相皆以進士顯今物故且盡而公歸然齒  
德望於鄉郡壽考終命得數之正其所積亦自厚哉銘  
曰自我而前為鄉賓自我而後為國珍又以其餘淑後  
人我見其終壽獨存孰後我者其吾孫乎

明故襲封衍聖公以和墓誌銘



公諱弘泰字以和為宣聖六十一代孫成化庚寅始襲  
封憲宗皇帝賜第京師命齒國學嘗見公所服玉帶使  
人問焉公對曰臣家門故事累朝恩數不敢廢也許之  
再值郊祀分獻內壇皆出親定壬辰辭歸上若曰卿其  
進學循禮表率宗族無忝聖裔以副朕懷丙申給誥命  
有司以二品例授犀軸公言舊典以玉軸為異乃改授  
之丁酉詔加廟祭禮樂公率族人奉表入謝先世有遺  
田百餘年散業他姓者過半至是皆贖歸之以贍羣族

己亥祖廟為雨水所壞公請命有司修葺完麗如故今  
上登極以弘治戊申入賀上視學命分獻充國公賜坐  
彝倫堂退率三氏子孫表謝復賜宴禮部及襲衣冠帶  
躬耕籍田亦預宴焉家居友愛交洽歲時遊宴相酬倡  
或夜分忘倦四方大夫士至者禮接不少衰己未公來  
朝聞祖廟災亟歸齋哭如居喪引咎自責居鬱鬱不樂  
庚申力疾而朝辛酉上疏乞休致上若曰卿其善自調  
攝以奉聖祀所請弗許時復有修廟之役公協相規畫

勞勩甚殷凡再越歲弗克躬覲事病既革執兄子聞韶  
手若有所屬者蓋公之封也廷議以為世嫡相傳古今  
通義乃按宋故事俟公之後仍歸其兄之子公母遺命  
亦以是公及見聞韶之成其乞休時嘗具名以請故至  
是猶惓惓云爾計聞上特遣行人諭祭者五有司給棺  
槨工部官屬治葬事以某月某日窆焉公美風儀善論  
議每評騭人曲直料事當成敗多奇中俾有職務將無  
不可為者而靜處優逸無由自見然承奉宗祀修治林

墓綜制家政其在孔氏有勞績焉若孝友無間之心剛毅不屈之氣榮名令聞偉然著於人人其在天下亦不可泯也嘗即魯泮池遺址築東莊別墅因以自號有東莊稿藏於家公生景泰庚午四月二十七日卒於癸亥五月十五日年五十有四予於公內交久公以兄命為聞韶議婚於予禮成之三年聞韶始嗣封爵則以父命奉狀請銘公墓嗚呼予乃遽為公銘耶銘曰孔裔周啟爵以代宗六十一傳兄弟迭封公繼兄爵在先帝世歷春

逮秋三十有四入主宗壻俎豆載虔出奉朝獻禮儀孔  
閑時斯歲斯我職在茲我有餘力而弗外施功名始終  
天所優假我所弗預疇其望者有命自君公荷勿隳有  
身自親公全厥歸維兄有子維祖有祀公所無憾庶其  
在此孔林北西公有世墓曷其祔之乃祖乃父公老在  
東公自為宗公子公孫其來無窮

明故光祿大夫柱國太子太傅刑部尚書致仕  
贈特進太保諡康敏白公墓誌銘

公姓白氏諱昂字廷儀常州武進人也景泰丙子舉南京鄉貢天順丁丑登進士第授南京禮科給事中嘗劾戶部尚書張鳳下之詔獄甲申改刑科成化戊子遷左給事中辛卯進都給事中嘗以災異言事謂陛下即位初詔罷貢獻停織造禁權勢抑異端而今皆不為衰止願守大信以令天下御史謝文祥以言事獲罪率諸寮救之壬辰擢應天府丞適署掌府事興學政定義役乙未改南京大理寺少卿辛丑遷南京都察院左僉都御

史兼督巡江有劇賊劉通出沒海上東南騷動公調兵  
所要害窘而招之通身自納款公諭遣歸率其餘衆以  
降乃執通送京師餘悉釋不問進右副都御史甲辰署  
掌院事丁未擢南京兵部左侍郎鳳陽祖陵圯公與平  
江伯陳公銳往修之方歲歉民困重役公調度得所二年  
而事集又以餘財賑饑民顧德之弘治己酉河決原武  
改公戶部右侍郎治之公簡率官屬築陽武長堤以防  
張秋引中牟之決以入淮浚宿州古睢河以入泗又多

為渠堰於徐兗瀛滄之間以殺河勢又開復湖於高郵隄東以避風濤之險其功甚勞歸改刑部辛亥攝都察院事遂擢右都御史令御史出按歲報有司賢否狀且視所報當否而殿最之請籍天下軍伍以便勾稽籍天下田數值水旱則視高下以蠲其稅癸丑進刑部尚書壹意矜恤凡情涉矜疑者多獲平反時法司苦條例繁公奉詔會官刪定頒中外行之甲寅加太子少保戊午進太子太保加光祿大夫柱國賜麒麟服己未在告上



遣中官挾醫問疾賜上尊少牢蔬米諸物再乞休致復  
加賜問免朝謁令善調攝起視事庚申疏累上乃許之  
進太子太傅賜勅給驛給月俸輿隸以歸癸亥七月某  
日卒壽六十九訃聞上念公舊勲贈特進太保謚康敏  
賜棺槨遣官諭祭者九命有司治葬事公性度宏裕持  
議常依於厚善裒高益卑因事為功決機應變無所疑  
滯待人際物各當其分上自王公下逮胥徒僕從見之  
無不意滿或以緩急叩之輒力為排解無所卹居官四

十餘年未嘗有怨於人人亦無怨之者然惟公能之他人弗能也居家孝睦事繼母甚謹弟昇早世卹其二孤以潔為戶部書算廕垣為國子生置田以贍貧族立義塾以教羣子弟置局儲藥鄉鄰疾病者多歸焉比歸不問世事園亭賓客甲於畿甸放歌痛飲以終天年世所稱五福者殆兼之矣嗚呼難哉銘曰官有九品而極於一壽有百齡其稀七袞仕途險夷明者難必家之承傳疇繼疇述盈則易虧滿則易溢迷先得後有始無卒兼

是數者指殊多屈耳目所逮公在甲乙有猷有功有名  
有實曷其致之惠迪斯吉彼弗惠者自貽伊疾蓋棺事  
定是謂永畢尚有遺恩光昭贈卹樂哉斯丘永奠幽室

定國公墓誌銘

公姓徐氏諱永寧字克安世為鳳陽人高祖達從太祖  
高皇帝為開國元勳封魏國公追封中山王諡武寧世  
嗣公爵曾祖增壽左軍都督府左都督太宗文皇帝靖  
難之後念其功追封定國公諡忠愍曾祖姑實為仁孝文

皇后次代王安王二妃家極貴盛祖景昌始封定國公  
賜號推誠奉事武臣階榮祿大夫勲右柱國給誥券考  
顯忠嗣一門兩公蓋本朝所僅見也公性敏喜讀經史  
通書法蚤失怙能隆師親友襲爵時年甫十有三儀觀  
秀美景皇帝愛之嘗奉使秦伊二府殊見禮重歷事英宗  
睿皇帝暨憲宗純皇帝將嚮用忽遘風疾不克奉朝請  
久漸沈痾間出觀戶外有貴近臣怙恃驕縱道路側目  
莫敢近公奮擊之其人策馬走僅得脫若是者往往

而然人疑公非病其中殆介介有白黑及問之輒失度  
時操筆折簡通親舊或作高昌西番字蓋其少所習者  
人益不能察也弘治甲子正月九日卒距其生正統辛  
酉三月十日壽六十有四上輟視朝一日遣官諭祭者  
再勅有司給棺槨治葬事皆如制三月九日寔於都城  
西馬鞍山祖墓之次公側室丁氏真定衛指揮使源之  
女侍公病日夕不懈比卒沐浴易服縊於公之寢室死  
馬光祚以聞下禮部覆實詔旌其門曰貞烈其事最顯

故附書之銘曰古爵五等今惟三公階最貴賈莫參下有侯伯無子男鐵券合契金書鑱河山帶礪國與咸父死子嗣限制嚴一門兩公世所瞻開國靖難勲名兼公生早歲頭角嶄蹶而勿振迹且淹朝謁雖廢祿尚儋以病自逸非荒耽盈虧謙益神所鑑祖德下被君恩覃公業有子箕裘堪世代圭組隨纓簪公全歸之意已厭上衽祖考無遺慚先迷後得數可占穹碑聳肩當嶢巖我銘其幽永不芟

封孺人楊母陳氏墓誌銘

楊孺人陳氏之喪其子給事中禔自為狀泣而請予銘  
其叙事行曰吾母生而為父母所愛歸吾父朴菴公時  
祖姑尚存性嚴急曲盡孝敬得其懽心喪居雖盛暑不  
脫衰經諸叔之娶皆手為綜理吾父以儉致豐吾母勸  
分諸叔無弗裕者見人窘急必給以衣食每昏夜聞乞  
聲必呼取剩飯與之暑月則躬煮茶置道側以濟渴者  
天未明即呼婢僕起治事有過則曲為掩護每食先問

其有無或未給則食不下咽族黨幼稚至輒與之果物  
爭攀搜索取不厭朝出雖雞犬聞步履聲亦叫呼以迎  
若是者殆以為常吾兄祚出為商訓之曰小民賣魚菜  
自活獲利甚微銖兩勿與較見傭工客作亦溫言慰之  
未始加訶叱焉教吾兄弟動引古書句及諺語為戒皆  
切中事理褫游庠校出試藩省輒戀戀不忍別比得官  
謝病歸省則曰汝壹志供職勿以我為念知汝宦情亦  
薄須少報朝廷歸即歸吾不汝強也褫再以使命至出



所積遺吾兄弟諭之曰汝輩為士為商皆有成業惟汝  
庶弟塘幼可厚給之蓋所以慰吾父者又如此尤人所  
難也且吾母之行無一弗可記者而隱於閭閻閭閻之  
間褊不忍死以狀誰其知之者若金石之刻徵諸女德  
古亦有之而非荒迷者所能此褊之所為請也褊以文  
行重於鄉舉湖廣鄉貢第一擢進士高等簡入翰林為  
庶吉士歷禮刑二科給事中有諫諍聲此則予所知者  
因次第其狀而著其母德為銘銘曰庸德之德德乃可

久惟德之久可以不朽內則之則雖美弗彰匪子之揚之孺人其亡乎

封淑人吳母林氏墓誌銘

封淑人林氏予同年友戶部左侍郎吳公道本之配也公卒之十年卒於家其子夢麒走京師以其事聞朝廷遣官諭祭令有司啟壙合葬蓋異數也夢麒舊以父命學於予乃述母德以請曰吾父之葬先生幸為銘今吾母將從吾父於地下銘曷敢有他屬予哀其志而許之林

氏與吳同出漳浦淑人生而貞順有則贈侍郎友松翁  
為子擇婦得淑人族黨交賀淑人羞膳必謹友松家政  
尚肅且好賓客又置義塾以教鄉子弟百凡饋饗皆淑  
人手出諸叔之幼也為之澣櫛巾服膏火之費有母道  
焉公壯而無子淑人為置側室林氏生夢麟財五歲抱  
置膝上口授論語孝經諸書蓋其所素習者不失一字  
後攜至京師遣就外傳時使人覘其所為或涉嬉縱輒  
加笞責及流涕復予之飴果而遣之若有疾則彷徨無

措嘗所過從若值良士則喜為設具否則怒形於色居未始以靡麗之服加其身曰恐喪而志而能力學得祿他日不患無此服也病篤執夢麒手而慟曰吾生七十有五年封至三品死不恨恨不及而之成以畢吾志耳自是痿不能起猶以手指使遷居正寢更衣而逝夢麒事母孝雖尺布一錢未始不請及其喪也匍匐數千里請命於朝君子傷之然能以家學舉鄉貢當繼得進士志業不墜雖公之澤亦淑人教也銘曰穆木在南小星在

東維大夫之宗維國之風吳氏以國林望以族維人之  
良亦維人之淑內行不出孰譽其美我友其夫亦傳其  
子祭有藻蘋教有典墳有刑者存淑哉乎若人身所鞠  
子實所從老從夫九原百世是保

岳母孺人陸氏墓誌銘

弘治乙丑四月二十七日岳母孺人陸氏以壽終距其  
生永樂癸巳十一月十五日春秋九十有三矣孺人為  
需菴處士公諱端之配於我外舅蒙泉翁為岳嫂自我

翁之沒三十有四年中間處士沒我外姑宋夫人沒吾妻之姊若妹沒者前後相繼而孺人歸然獨存有子女各一人孫二人外孫女一人最久且盛至是乃卒蓋岳氏之老長於是乎盡予雖為孺人幸之亦烏得不為之哀之也耶我翁與處士公暨仲兄千戶詳從弟海共敦友愛旁睦羣族及諸子姓皆極恩意孺人實有助焉養姑之寡妹二十餘年預置棺歛卒襄後事女嫁南京戶部主事王璚早寡迎致於家曰以成而節且嫁其孤女

于今萊州府通判任經曰以畢而志其他中表諸黨貧不能衣食婚嫁死不能葬者多賴以濟翁交四方名士假屋誨學踵接於家館穀膏火之費皆其手給未嘗厭倦後多舉大魁登進士布列華要訪道舊故皆以嫂稱之且譽其賢無異辭焉翁之戍於甘也以宋夫人從孺人事太夫人劉氏曲致懽慰及遷於莆也俾其子坪侍之行諸女之嫁奩物饋具未常弗稱坪娶於曹氏生子梁及槃孺人愛不弛教肅然有故家風範蓋其自少至

老無一日不治家務雖病卧床褥猶云云不絕齒德之  
茂誠近時所僅見也予道南京以翁命主於陸氏見其  
昆弟子姓富而好禮知孺人內行有自既託嫻屬久而  
周旋其家雖欣戚事異而情理不少殊孺人之喪卜以  
某日坪力疾來涕泣而請曰忍不為吾母銘耶予以官  
守遺執紼之役亦忍不銘銘曰夫有主婦維德之耦  
家有壽母道乃可久人壽十袞茲過其九匪我能創亦  
我能守維族之望維業之茂所未竟者以遺厥後





懷麓堂集卷八十六

欽定四庫全書

懷麓堂集卷八十七

明 李東陽 撰

文後稿二十七

誌銘

明故吏部尚書致仕贈特進太保謚恭簡尹公

墓誌銘

吏部尚書尹公旣致仕十有八年卒於家上聞訃嗟悼

遣官諭祭勅有司治葬事仍贈特進太保謚恭簡賜之  
誥命褒舊績也公姓尹氏諱旻字同仁世為歷城官族  
公七歲知讀書稍長下筆數百言正統丁卯舉鄉貢第  
一連擢戊辰進士簡入翰林為庶吉士己巳授刑科給  
事中景泰間值國多事屢有建白皆傳正義天順丁丑  
遷左給事中英廟見其儀觀魁偉音吐洪暢欲大用之  
尋擢通政司右叅議轉左叅議己卯旱代祀海岱禮成  
而雨庚辰持節封安南國王盡却餽遺國人斂服辛巳

王師有事於陝西公出總軍餉有白金綵幣之賜壬午  
丁母艱癸未驛召至京師擢吏部右侍郎成化己丑遷  
左侍郎歷王李姚崔四尚書皆曰代此位者必公也壬  
辰漕河壅滯公往督官運事遂集癸巳勅拜尚書命侍  
經筵戊戌加太子少保賜玉帶麒麟服己亥加太子太  
保累進階至光祿大夫勳柱國甲辰加太子太傅公久  
掌衡鑑博采公議不為私撓天下翕然稱之有姦吏李  
孜省者貴幸用事憾公甚構成大獄再削職以尚書歸

公不自辯列惟引咎自責而已今上御極攷省既伏法乃吐實於官諸黨惡者罷黜殆盡而公壽考終命竟膺褒卹非獨復其故物而恩禮有加焉然則世之以仇怨相傾擠竭計盡勢而不為後地者亦何益哉公素負學識善斷大事尤精鑒強記每經銓注雖稠人小吏閱數年猶識其名時料人壽天成敗厯厯多奇中故其退也大夫士屢䟽薦欲起之而公亦老矣惜哉公生永樂壬寅五月二十八日卒以弘治癸亥九月十七日子龍已

丑進士前翰林侍講先公十年卒孫繼祖以公恩廕中書舍人予與公居鄰每挹公風度聆其言論未嘗不歎服焉比聞公喪慨耆舊之不可復見而繼祖以遺命具疏奉狀請予銘是惡可辭銘曰赫赫英祖簡修進良燕翼厥謀以詔憲皇翹翹尹公行譽言揚給舍獻替銀臺出納聲名焱馳意氣山拔亨衢在前靡適非達天曹我我公實任之端居廟堂進退百司絜短校長左右具宜翕受敷施惟帝所用手操權衡與世輕重北馬羣顧南

金品貢二十四年既久且專手所植樹其高蔽天棟梁  
桶榱百材萃焉盛名難居造物所忌城門魚殃崑崗玉  
碎少行老歸綽有餘地人才實難矧惟老成曰篤不忘  
天王聖明爵以酬勞謚亦稱情天之定矣人之勝矣君  
子有性不謂命矣九原有知公可瞑矣

河南按察司副使致仕陳君直夫墓誌銘

吾友陳君直夫舉進士拜南京貴州道監察御史三年  
丁外艱服闋改陝西道又三年丁內艱再改河南道皆



在南京遷江西按察司僉事二年致仕歸十餘年南京  
兵部尚書張公悅薦其志行可大用乃起為福建僉事  
督理屯田又二年復乞致仕時倪文毅公為吏部尚書  
特擢為河南副使都御史林君俊舉以自代不果入再  
乞致仕巡撫都御史孫君需請留之巡按諸御史交薦  
之又二年竟致仕去君子觀其進退之際可以知其人  
矣直夫鯁介寡合雖生長都會而有山林性氣不能與  
物湛浮遇節義廉潔士傾心嚮慕稍不合輒憾頰而起

若將浼乎其身家素寧奉親志養常俸外一無所取居喪非義賻輒辭弗受屏居舊鄉去府治遠足不至公室人以請託至必峻却之久亦無復至者惟事兩兄嫁其女撫妻之孤弟建祠堂以合族他無所好非所當赴雖故舊強之不屈也其蒞官政務公與慎在南臺力操風紀嘗上疏請止中官取花木抹言事之不得其職者在江西持法甚謹在福建清屯田在河南賑饑民皆悉心綜治不苟應故事顧其所拂意者恒多雖黽勉就職而志

常在退其去也蓋有遺用焉若其經業精貫博涉史籍  
使得當督學之任必大有興作世之用違其才每如此  
是豈獨為直夫歎哉然直夫之所自處則可謂不失也  
已直夫諱壯自號古迂浙之山陰人生正統丁巳其舉  
進士以天順甲申卒以弘治甲子十一月十三日乙丑  
某月某日葬黃龍尖山之原予與直夫同京產又同甲  
第雅相知厚予久叨仕籍直夫每致書札無一褒譽語  
至相稱謂雖老必以字未嘗效時俗舉爵號故予銘直

夫亦以字庶其有知尚能諒予且以為其子終治命云  
銘曰抗世孤立不西以東執德之恒以與始終衆闕而  
蹈我若弗聰行我者天藏我在躬縱不大施弗喪厥衷  
吁嗟直夫其古人之風乎

明故贈文林郎翰林院修撰顧公墓誌銘

比歲崑山大夫士有斯文會諸耆宿有延齡會皆以桂  
軒顧公為長縣官舉鄉飲亦為賓會詔賜高年冠服巡  
撫都御史為之致命於家暨其子鼎臣狀元及第授翰

林院修撰報未幾而公卒復會詔賜京朝官誥勅時鼎  
臣方以憂去上特予之於是公獲贈如其官階文林郎  
而不及見矣公之孫監察御史潛亦嘗為翰林庶吉士  
故鼎臣暨潛奉左庶子毛憲清狀請予銘墓毛蓋其鄉  
人故知之特詳云公諱恂字維誠桂軒其所自號也生  
而秀整敦確學舉子業有成禮部主事吳相虞慎許可  
見公於塾器愛之請於耕樂翁內為婿時吳方游宦南  
北有母老無他子弟家政悉以屬公公年未二十即力

為營治不避勞勩內無私蓄業寢裕然未始廢學雖居  
屢閱書卷不去手母沒痛不獲養哀毀特甚感時觸事  
輒聲為謳吟久漸成帙葉文莊公為感而題之禮部既  
卒公始出居於外時父耕樂已老奉養備至喪葬無違  
禮仲兄及寡姊皆高年家居亦禮事焉族黨有貧者時  
致粟帛見里中後進必勉使為善多所成就有弗孫者  
恬然應之弗校也教子孫必以詩書禮義仕者為忠居  
者為孝親賢遠姦敬老慈幼言亶亶不厭故潛積學礪

行督京畿學政人服其公弔臣雖未試而器識材局論者  
以為不負其選皆公訓也公為詩興致和適所著有鰲峰  
稿五卷啖蔗餘甘西湖紀遊各一卷藏於家公生永樂戊  
戌六月二十五日卒於弘治乙丑五月二十六日壽八十八  
是歲某月某日葬於縣西鹿城之原銘曰盛德之世民多  
老壽協氣攸萃事亦非偶公年實高踰八望九踰九者誰  
公有嚴父惟兄及弟叢生並茂如彼松柏其凋獨後匪惟  
考終惟德攸好惟子幹父惟孫念祖公澤不匱名不可朽

贈中憲大夫太常寺少卿兼翰林院侍讀靳君

墓誌銘

贈太常少卿兼翰林侍讀丹徒靳君以成化壬寅五月五日卒塋於焦石山之麓越二十有四年當弘治乙丑十有一月朔日厥配封太恭人范氏卒於京師其子貴以喪告上特遣官諭祭命有司治葬事貴懼舊壙弗稱改卜於果山之原以丙寅某月某日遷父柩奉母而祔且念潛德久弗白徵同官費子充狀請予銘予稔知貴



且見其居喪禮而哀銘惡忍辭哉公諱瑜字廷璧正統  
丙寅以鎮江府學生應貢入南京國監授温州府經歷  
溫兵民錯處吏率不盡法君確守峻制不枿牙角知府  
周琰器之曰此非一幕才也凡督捕機宜若征輸水利  
先屬他官者悉改屬之應手而辦有千戶訟民家已聘  
女為妾以賂請君暴賂於衆女卒歸所聘府倉例有賂  
君獨不受餌姦無所於宿君貌不甚揚人易之至是聲  
傾一郡周益禮重稱為先生而不名每出輒令攝篆君

積粟備賑舉墜補敝初若非攝事者瑞安平陽二縣界  
有海塘田苦風潮君築治完固民利之名之曰靳公塘  
民有恃險拒捕者官將處以大逆君憫其愚親莅所在  
譬曉之其人感悟歸罪家得不坐海盜忽熾君以計擒  
其魁餘黨遂散通判闕君適入覲溫人投牒吏部請君  
或諷令少事關節君正色拒之事竟寢解官移家居十  
有餘年溫人道鎮江者必問安否大夫士還往慶弔若  
親戚然至於今不衰且其為人孝友好施予尊賢禮士

教子尤篤按察僉事丁玉夫遣貴受學丁後果有重名  
蓋其厚積薄發才弗究於用乃以成其子之賢而顯其  
家固在茲哉太恭人同里名家女也慈惠朴厚事姑謹  
甚久弗育為君置媵君義弗內竟遣之未幾得貴貴既  
進士及第迎養於官非公事未嘗一日不在側如是者  
終其身太恭人性亦好義所施棺具無慮數十計偶弗  
適聞貴有所賙卹輒為之加一餐云貴以學行累被簡  
擢直講儲宮以登極恩進今官以兩宮尊號恩進今封

比又有日講之命太恭人皆及見之壽至八十有八得正而斃禮合而葬其於君盖有光焉銘曰事有幸會寧幕無倖彼賄進者自貽伊愧意或值悖無進寧退彼戀位者亢不知悔彼得其外我得其內矧惟我餘天有錫類我所生者於我終代既盈我虧亦發我晦持此絜彼獲詎非倍由初質今若取諸貸若田既秋功在一溉謂天弗明安所置喙惟魄有藏於彼江介遷斯祔斯曰有令配載徵厥祥來者未艾

贈通議大夫通政使韓公墓誌銘

贈通議大夫通政使韓公諱傑字仲彥及封太淑人蘭氏通政使昂之父若母也公以昂貴初用皇太后徽號恩贈禮科給事中再用考績例贈通政右叅議移封例贈右通政比新天子登極加命今秩則兩宮尊號恩也太淑人始封太孺人累封太宜人太恭人以至今號命下乃卒且合葬於是朝廷遣官諭祭令有司治葬事仍給驛歸其喪而公與有榮焉公祖諱槃起家鴻臚寺序

班終吉州吏目父諱尚敬贈如公官公生而天質秀穎少失怙居鄉無師傅自識文字通大義律已應務默合理道孝睦勤儉非義不苟取顧喜賙施貸不能償償不及數者輒為棄責鄉之人德之曰公有陰德他日必大貴富然竟不沾一命暨其子之成而不及見矣太淑人蚤閑內則吏目之在吉也公實從行聞其賢以祖命聘之公雖宦族而世襲清苦與寒士無異太淑人躬井臼為養祖姑以下皆安之吏目卒歸橐蕭然姑久卧床褥

太淑人侍湯藥夜未始帖席悵悵如不欲生姑念之曰  
真孝婦也比卒舅及祖姑皆繼卒太淑人連舉三喪情  
禮兼備人稱之如其姑之稱公既卒太淑人日事紡績  
衣食其家不以煩其子故得專學問以底大成聲績  
累著致於九列太淑人就祿養被命服怡然終其身古  
稱婦德不外見太淑人以壽且顯大夫士還往相傳播  
至形誦詠故其事加詳云通政君嘗督河安平得太淑  
人壽詩成卷適予以祀事東返請為序比被召領易州

薪炭塲務以喪告於朝復請予銘禮恭而意傷辭弗獲  
乃按禮部侍郎王公德輝狀為銘銘曰慶山之陽有田  
孔良既畎既疆有菑弗荒有婦饁我力復協我有子我  
播亦復獲我古有耕道亦有種德以小喻大不遠維則  
生雖弗榮沒則已哀老弗及偕卒同厥歸始則同勤終  
則共逸為勤孰名逸則永畢有封若堂若所胥宇九原  
不亡可質斯語

明故封中憲大夫太常寺少卿前陝西按察司



副使劉公墓誌銘

封中憲大夫太常寺少卿劉公約之文恭公之子也舉進士歷大理右寺副累遷右寺丞出補延平府同知進漳州知府擢陝西按察司副使歸及其子榮為尚寶司卿陞階從肆品以考績例得誥進公今階今天子登極公以致仕恩當復進階而榮以東宮正字恩進今官以兩宮尊號恩當復給誥則又以移封例回所得誥封公為今官命已至而公卒朝廷遣官諭祭如例而特勅有

司治葬事蓋公以世業繼顯科為要官中道蹉跌久弗大振而晚歲遭際皆奇特出常格如此云公諱瀚約之其字別號樗菴少為蘇州府學生景泰庚午領南畿鄉貢卒國子業有名其舉進士在天順丁丑試政禮部頒詔至揚州府府餽金二鉅公峻拒弗納列郡皆相戒勿餽縉紳繪却金圖賦詩頌之其為大理在天順成化間讞駁詳慎嘗奉勅錄京畿及江西重獄平反四百餘人出賑河間諸府饑民籍名給粟者十五萬其為同知八

年專理戎籍多所釐正鄰郡懇訟者踵相沓為知府得  
專制鉏強抑暴民甚安之部使旌於朝章至八九上為  
副使益持憲體會邊徼多事督餉不乏資望日積而遽  
致事以去西安府餽金為贖却之曰不聞致仕與在任  
同耶時弘治己酉也居鄉十七年足不至公室歲鄉飲  
有司禮為大賓其平生服履孝義與人交際無諛詞妄  
語精法比達政體善古文歌詩而終身不自伐續未屬  
呼諸子孫至前連舉孝弟忠信四字訓之猶懇懇不置

其卒以乙丑十二月二十二日壽八十有一矣配吳氏  
有內行先公二十餘年卒累贈恭人子男十一榮其長  
也為中書舍人直內閣預經筵國史事以慎敏稱每欲  
歸省不可得比卒乃請予銘禮也吏部侍郎王公濟之  
方修郡志列公名宦當藉是以傳銘惡足恃哉銘曰儒  
臣之子為刑法家內守外臺厥績孔嘉理同事殊父有  
遺教其所為教維甲科是紹亦有遺恩匪我自取所弗  
自取維以貽我後維詞及翰亦詎非儒還以錫予其祖

風之餘乎

明故資德大夫正治上卿都察院左都御史贈  
太子太保謚恭簡戴公墓誌銘

都察院左都御史戴公既寢疾遺囑其從子兵馬副指  
揮星曰不得以卹典累朝廷已而禮部稽據典制以聞  
上再賜諭祭令有司治葬事而給驛遣官護歸其喪監  
察御史楊儀等數十人以公督學所造士合詞上請特  
贈太子太保謚恭簡蓋於禮加隆焉公諱珊字廷珍其

先宋錢塘令士先自婺源徙浮梁祖諱嗣安以子昇貴  
贈陝西布政司右叅議考諱昇嘉興府學教授皆以公  
貴累贈南京刑部尚書公以縣學生舉天順壬午鄉貢  
甲申登進士第成化丙戌試四川道監察御史服闋乃  
授職壬辰督學南畿凡考校必以文藝占器識有請謁  
者孫不色拒而終一無所撓羣士帖服至無後言戊戌  
遷陝西按察司副使仍專學政政如南畿地加廣雖遐  
陬僻壤未嘗不到修古聖賢祠廟或增秩祀典聞民間

孝節事亦奏旌其門甲辰擢浙江按察使令尚清肅丁未遷福建右布政使弘治戊申轉左布政使勤教養通財賦情法兩當論治體者必歸之己酉擢都察院右副都御史撫治鄖陽諸府豪右多窟流聚為利公刻日令首罪民所闢田多匿稅畧償所費而設其餘嚴練兵伍自製為營陣法蜀盜野王剛越境入竹山平利諸縣守臣畏罪莫敢發公請合湖陝兵誅其首惡縱其脅從千餘人事遂定時偉其功公不自伐也辛亥召入為刑部

右侍郎乙卯轉左侍郎嘗會勘荆府不法事皆得實時羣疑交訐朝廷是公議卒行重典丙辰拜南京刑部尚書讞獄尤謹庚申復召為左都御史公益自檢律務持風紀雖簿書之細必極精覈嘗與吏部考察京朝官者一考天下述職者再孝宗皇帝親鞠大獄諸司震悚公從容應對時有所開折天威頓霽上知公清慎每廷宣面問至移晷刻引疾求退必優詔勉留命醫賜食間有慰諭若家人父子然者公不覺感泣上亦為之動容章



前後六上留益力公遣其妻若子先歸以身待命乙丑  
新天子嗣位公不敢輒言去力疾視事疾再作竟不起  
卒之日為十二月二十三日距其生正統丁巳三月七  
日壽六十九娶夏侯氏累贈夫人繼吳氏累封夫人子  
晴國子生公廕也正德丙寅吳夫人挾晴來扶柩歸以  
是年某月某日葬於某山之原公德性和粹中耿耿不  
苟合而洞達無城府奉職守法不為物撓而意常近厚  
祿仕四十餘年家無餘貲壹意官守雖尊官高年猶手

削章牘辰入酉出窮寒暑不變敷歷中外所至有聲績  
學政尤著身既没人至今道之不衰所著有松厓稿數  
卷公在同榜中夙見知厚常謂予曰子必銘我其治命  
亦屬太子太保閔公以及於予嗚呼是安可負哉乃哭  
而銘之銘曰昔我孝宗咨訪耆碩公長中臺時聞造膝  
公秘不洩曰我后之德公簡帝心帝監公直公所執法  
躬就繩墨其有弗率則惟我職無曰棘棘或爾默默我  
法弗忒曰我無遺責世有碎玉亦鮮完璧惟公始終有

美無擇惟帝嗣位惟父臣是式臺評廟議亦懋爾績古  
亦有言天壽平格有平若公壽弗臻極惟所遭值及所  
樹植令名在茲永耀金石

明故福建按察司僉事致仕進階朝列大夫蕭  
公墓誌銘

海釣蕭公既寢疾附戶部郎中王君蓋告訣於予未幾  
其子鳴鳳哀疏至則奉治命請予銘予為之泣然以悲  
蓋自壬子之秋別於城南僧舍十五年於今矣嗚呼予

乃竟為公銘耶公諱顯字文明號履菴更號海釣以山海衛學生舉天順己卯京闈第二成化壬辰乃得進士第甲午擢兵科給事中有武臣中官怙勢求賞者公批奏尾駁其功坐是賈怨弗恤也涿州有巫矯邪神自東方來京城男女爭負土為築祠宇公抗章劾之并禁私剏菴觀等數事言極剴切留不報外間傳言禍且不測忽召至左順門令中官諭遣之人始知其事後數日詢之則巫已逐矣然權幸人嫉之不置辛丑遷鎮寧州同

知時方作草書手閱朝報付其子趣治裝仍終數紙乃  
罷鎮寧非人所居其俗每獻饋流官納則喜拒則疑公  
孫謝理諭皆敬服無敢怨者越八年為弘治戊申稍遷  
同知衢州府勾稽戎籍所得隱丁甚衆越三年辛亥擢  
福建按察司僉事承勅領屯田事勸督交至民相率輸  
納歲無留逋又一年以萬壽聖節入賀刑部尚書白公  
昂欲有所薦擬親戚有力者亦樂為之援公不復顧戀  
上疏徑歸歸數日而命下乃治別墅與騷人使客游衍

其間有乞書千文者秉燭終卷遂得目青而賦詠不輟  
乙丑今天子即阼以恩進朝列大夫正德丙寅十一月  
二十六日乃卒續未屬猶憂及時事且口占對句課其  
孫其至死不亂如此距生宣德辛亥十二月十一日壽  
七十六公德性醇篤不妄言笑早失怙恃終身孝慕事伯  
兄文清甚謹撫其孤引鳳為之婚娶比死又厚葬之交  
友尚意氣久而不變當官盡職視患難若所當得至於  
幾先勇退順時正命尤士君子所難雖所蘊蓄未盡見

於世顧以劉文安公為主司而得易魁以三原王公為  
吏部而得薦為方面則其人可知已山海本用武地舉  
科第工詞翰皆自公始公詩清簡有思致所著海釣集  
鎮寧行稿歸田稿若干卷其為書尤沉著頓挫自成一  
家卷軸徧天下傳至外國後來者殆鮮及云配喬氏繼  
馮氏子五孫三羣從孫為諸生者尚數人喬孺人之葬  
予嘗為銘今公與兩孺人合葬於某山之原則丁卯閏  
正月十六日也銘曰孰得之難弗患失耶孰進之難退

乃亟耶將理有先難後則獲耶抑數有終信而始則誣耶不然何壽其身而復世其澤耶觀德者蓋以世而不以日耶

明故朝列大夫南京國子監祭酒羅公墓誌銘

天順甲申廷試進士憲宗皇帝在諒闇制辭從簡以治國平天下之道為問泰和羅公璟對以為孝乃萬化之原願舉此推之以成聖治上深納之賜及第第三人與吉水彭公教太倉陸公錢皆天下選也彭陸皆不壽以



沒公獨考終於家而今亦不可作矣惜哉公字明仲其  
先有伯壽者為元盧溝簿被旌為孝子曾祖子理國初  
為德安同知繼娶陳夫人即少師楊文貞公嫁母也挈  
家戍西安文貞言於上為蠲其籍得公祖賓廉以歸公  
父進善從文貞居夢鶴而生公額有赤誌可寸許文貞  
曰此鶴相也當貴且多壽公未弱冠文貞已卒讀其家  
所藏書文思溢發巡撫侍郎楊公寧奇之遣入縣學初  
仕為翰林編修修英宗實錄成化丁亥書成遷修撰嘗

上疏言六事上優詔答之慈懿皇太后之喪屬有異議公上疏言宜合葬裕陵又與諸學士合章以請乃得俞命壬辰同考禮部奉命校通鑑綱目癸巳修續綱目甲午充經筵官丁酉書成擢司經洗馬戊戌孝宗進學東宮簡侍講讀庚子主考南京凡所校閱暨精當而是科得人尤多癸卯以母喪去丙午闋服上京師忽調南京禮部員外郎中外駭愕莫知其故後李孜省獄詞上乃知為所中或云鄉人有弗合者構成其事而公不自

辯也弘治初三原王公為吏部薦為福建按察副使專督學政政尚寬簡程試外恒以義理為教士類悅服癸丑召為南京國子祭酒方將大有施設時已沾疾猶力起治事丙辰考績京師至河西疾作乃具疏乞致仕遂得請癸亥七月二十六日卒距其生宣德壬子某月某日壽七十二禮部為請於朝上眷公舊學特賜諭祭命有司治葬事云公端雅諒直志識不羣博學高論動以古人為準平居不事詭激而崇獎節義汲汲若不暇視

天下事皆所欲為中值困阨累歲再陟稍克振拔而公亦病矣為文務簡勁詩亦脫綺靡有冰玉稿若干卷蓋其所自號因取以名其所編錄若五經旁註周易程朱異同刻於福州予與公同榜又同在史局為道義交恒念公之退不能薦死不能弔以為公負公卒之五年子燧以治命奉狀來乞銘乃為銘以補葬禮之闕公墓在白泉山之原其葬以甲子十二月二十九日至是五年矣銘曰濟辯以博孰我鋒遏守正以約亦孰我志奪惟

其人之卓乃命之閼九原是託惟斯丘之樂孰斯人之  
能作

懷麓堂集卷八十七

欽定四庫全書

懷麓堂集卷八十八

明 李東陽 撰

文後稿二十八

誌銘

明故工部尚書進階榮祿大夫致仕贈太子太保曾公墓誌銘

公與予同出湖南同籍京衛入京學同舉進士第前後

四五十年交最稔去冬公訪予病弗果見為之悵歎以去今春予始入覲而公已病越數日遂不起其子沄以治命乞銘嗟乎予竟不獲與公面訣而遽銘耶公姓曾氏諱鑑字克明舉景泰丙子鄉薦其舉進士以天順甲申試政刑部通州民十餘輩坐盜獄且具公辯其誣人惑之後果得真盜乃大服初命為主事尋以父喪闋服改工部督造供應器物綜理甚精改吏部驗封遷稽勲員外郎母喪服闋再入驗封進郎中奏擬精核人無訾言



議成化丁未擢通政司右通政專領武官誥籍弘治庚戌遷太僕寺卿馬政修舉壬子擢工部右侍郎督易州山陝薪炭事剗治經畫事集而人不擾乙卯召還轉左侍郎修倉庾葺宮掖充唐府冊封使庚申拜尚書修諸禁門社稷壇及京城垣隄凡涉公帑民力者時執藝以諫上嘗召至便殿趣造戰車公言派辦不可亟請以舊所積榆槐木為之又嘗問工匠缺乏公歷陳災傷逃徙之故皆見嘉納正德丙寅修盧溝橋隄製內殿龍毯百

餘特賜玉帶若白金綵幣等物不可殫紀前後所得勅  
誥贈封其二代及妻者凡四命廕其子二人既病亟具  
疏乞休上念公勤慎勉從所請進階榮祿大夫令有司  
月給米三石歲給興隸四人命下而公已卒矣訃聞上  
悼惜贈太子太保遣中官賜寶鏹萬貫為賻遣禮部官  
賜祭者再仍令有司治葬事如制云公溫純樂易不事  
矯飾雖風雨寒暑不廢朝謁官事未畢繼之以夜性敦  
孝友兄弟同居曰首無間言族里窮急力為周施而自

奉簡約不為祿位所移易部吏少俊者教以舉業且為給膏火費後舉鄉貢者二舉進士者一皆德之終身下至僕隸亦感慕無飲怨者是亦可謂難已公生宣德甲寅六月二十三日卒於正德丁卯閏正月八日得壽七十四以三月二十四日葬於都城南五基之原其配陳夫人合馬公初娶於陳生子洪側室滕氏生子沄今為國子生公遺事尚多尚書李公時器有狀銘不能悉也銘曰卿有六署公居其三幼學壯行老且益諳工曹最

繁公所終始世歷累朝歲幾四紀夙興夜寐心矢靡他  
日累月積歲計實多盡瘁而生得正而斃亦有餘恩為  
身後地凡器之類銳必先折公戡其鋒有用無缺凡物  
之生早必先萎公歛其華有實之理公不言功皇則念  
之公不責效天則驗之孰傳厥宗家有介子孰最厥名  
國有太史

明故太子太保南京兵部尚書致仕贈少保王  
公墓誌銘

今年春上釐正舊典特嚴贈卹公安王公適以訃聞吏  
禮二部最公功行既遣官諭祭命有司治葬事復特贈  
為少保蓋公為尚書以平蠻功加太子少保以致政加  
太子太保至是凡三加而公不及見矣公自憲宗朝為  
大理評事累遷右寺正奏讞精覈嘗奉勅錄四川囚活  
百餘人勘陝西藩府大獄不避權貴擢四川按察副使  
孝宗朝改陝西復為四川按察使其分巡川東發廩賑  
饑又請官銀十萬兩為糴費民賴以不死者甚衆有貴

州苗弗靖已徵兵進勦公獨謂不煩師力卒從其議比  
長憲有滯囚累千人應手而決先後凡四入蜀民習政  
教去之日老稚遮道不忍釋孝宗朝遷南京都察院右  
僉都御史兼督巡江官校例出巡捕公奏令御史偕行  
以防掎克總督京儲出納明允會貴州巡撫官闕朝廷  
特勅公往黜藩臬不職者數人土官子皆令就學以消  
獷習入長大理多所評駁嘗與兩法司擬定問刑條例  
行之復入南京為戶部尚書其所綜制如督儲時加法

為詳其督師貴州也值米魯之亂勢甚熾特命公兼左  
副督御史統本鎮及楚蜀廣東西諸路官軍土兵十二  
萬分四道以進雲南兵亦來會扼其歸路賊先送所沒  
內臣於軍及戰北窮走首惡就斃擒斬賊徒五千二百  
級俘其屬千二百人還所掠男婦五百餘人破其寨菁  
千餘區燬其倉屋十倍其數獲其牲畜又三倍之赦諸  
脇從且立故酋之後以統其人上賜勅獎勞名還京師  
道引疾乞休弗許既陞見賜白金綵幣尋改南京兵部

參贊留務秩之始加也論者以為未稱其功而公求去  
益切三歲間章十二上乃得請上賜勅給驛月給廩粟  
歲給輿隸卹典之備復有俟於後云公諱軾字用敬世  
為荊望子五貢舉鄉貢士賞縣學生先卒贊亦舉於鄉  
資以文廕補國子生貞以武功授總旗賜冠服公生正  
統己未九月二十日其卒以正德丙寅十一月十六日  
葬以丁卯某月某日其地曰某山之原公篤孝友撫孤  
姪有恩簡直無偽持論常近厚自奉儉約不避勤勸所



陳利弊無慮數十條多見采納歷官四十餘年人無訾  
議至交章騰薦其病在告又趣起治事所領兵刑錢穀  
皆劇務所至有聲績而貴州功尤偉予與公同出湖南  
又同舉進士故贊以治命奉兵科左給事中鄒君文盛  
狀來請銘銘曰有苗西南匹婦為孽潛噬虐燄如燎斯  
烈帝簡公才徃授之鉞坐帷定計分兵擣穴如竹斯破  
應時解節苗民歡忭如水濯熱公來何遲公去何猝公  
歸獻馘帝甚喜悅論功在廷公不自伐辭章疊上勇退

幾決如藏太阿有用無缺功名始終指詎多屈史有特筆必先大節我銘公行以厲來哲

明故封徵仕郎禮科給事中李君墓誌銘

泉之晉江有李封君者諱杲字世白兵科左給事中貫之父也以子初命值聖天子御極上兩宮尊號恩封徵仕郎禮科給事中錫以勅命鄉之人榮所被命兼賢則君之之義皆稱之為封君封君云君初學春秋不樂為科舉業然專用教子講解程課倍於外傳貫既舉鄉貢

無他兄弟不忍出求仕君攜上京師試禮部弗利而歸  
教益至越數年貫始得進士入翰林為庶吉士每念君  
不置將引疾歸省君聞之曰奈何以我故廢業復間關  
北來留官邸諭以守身蒞政之法閱數月乃去去則屢  
致書申告戒疊疊不厭其誨廸周悉蓋如此故能成子  
之名貽其身大顯其家君子曰固宜君敦本篤行蚤失  
怙恃鞠於繼母陳氏事之四十餘年曲盡孝養陳至今  
康樂無恙事前母兄景如其父君平生好義舉縣有六

斗門潄水溉民田可千頃一日盡決縣簿董修治役漁其利功弗時就君衆讓之為所窘民閔甚將甘心焉君曰吾固民也其無所與校乃止君輕利好施值歉歲則蠲佃租之半傭人老羸者均其直鄰黨有貧者輒周之刻意古學涉獵羣籍先達博雅並加推讓羣子弟皆取則焉君生景泰某年正德某年卒年僅五十七惟貫一子有行與藝偉然遠器也女四人適某某皆縣學生工科都給事中許啟衷閩人也嘗奉使道晉江獲見君豐

容雅度言溫而氣充殊禮重之比還朝貫亦以使歸則  
聞君已捐館因狀其行貫奉以請銘狀稱君所居有松  
數十株惟意所好因自號愛松故予誌以爵舉而銘以  
號著終君志也銘曰居視所與物亦有焉彼愛者松惟  
物之賢中貞外堅不與外妍排風傲霜以歲以年善者  
好之如此松然發為枝柯其高蔽天後寒而凋名則固  
存封以識之永矢弗諼

封太孺人趙母胡氏墓誌銘

編修趙生永既喪其父文林翁獨奉母胡太孺人以居  
越三年永舉鄉貢九年舉進士被簡為翰林庶吉士又  
二年授今官未考績聖天子嗣位恭上兩宮尊號以恩  
被勅命於是贈翁如其官而封母今號又二年當正德  
丁卯太孺人年七十一以壽終永哀經來請曰先生既  
銘吾父寧獨為吾母靳予愴然感之乃據其所自著狀  
為銘胡之先出湖廣沔陽太孺人生而簡重和惠聞講  
說前代故事涉女德者輒能領解嘗有相工至其母欲

見之謝曰吾聞女子行必擁面奈何輕以示人相工曰  
無俟面矣年二十一禮歸趙氏文林翁諱貴為繼室姑  
年幾九十太孺人佐夫致養倍於恒品食必手製湯藥  
必嘗而後進翁先娶吳氏遺四女太孺人視若已出鞠  
育周至比長擇宦族歸之翁久未有嗣太孺人為置二  
媵德常下逮已而自生子永其長也翁置塾延師羣鄉  
子弟與之共學每躬課所業欲給錢以勵勤者太孺人  
曰勸之以利非所以訓也請以紙筆充費翁曰吾慮不

及遽從之永之學於予也太孺人實佐翁翁將易簀指  
永示之曰此汝責也及卒太孺人哀毀踰制雖一茶必  
以薦念與翁勤家久始致豐裕至是獨綜內政凜如嚴  
君戒永曰汝之業汝父之遺望也我幸不死獲見汝之  
立庶幾報汝父於地下自是每語及輒泣下沾襟永用  
是厲學砥行揚親亢宗增飾堂構光於徃世母之教固  
不可誣哉銘曰為夫代終而保厥豐教子既庸而饗其  
封生無憾容沒有遺寵九原其逢寧不曰孺人之功乎



明故封翰林院編修徐君墓誌銘

有談吉水徐封君之賢者禮部侍郎費君子充曰君諱  
晉字廷亮以字行夙敦孝義羣從昆弟類以豐裕相勝  
君父處士公獨守故業無所增拓顧樂為施予母高孺  
人尤慈煦見饑寒困迫如切其身族子失怙恃育而室  
之凶歲或鬻粥以飼餓者君每承命必竭力行之逋不  
能償者焚其券人或以為難則應之曰麥舟不俟命而  
發矧既命乎君子曰善養志者剛直負氣見嬖嬰澠忍

之人殆欲唾之當廣坐中非非是是無少假借用是為人所憚或以賈怨無他兄弟中外侵暴屢遭瑣抑竟不為所屈或被卵翼後黨附仇視者待之如初及諸子成立家寢盛皆草面求納又待如初其人卒自慚悔若無所容蓋其內有涵蓄不過為忤刻又如此晚益韜戢世故不一掛齒頰因自號曰閤菴著志也平居足不至公府鄉飲禮請僅一赴後不復往嫺戚請託語涉官府輒顰蹙握手謝之一布袍十稔不易既以子穆貴被錫命

非令節嘉禮不服綺繡勤勵自策夜卧蚤作卒以為常  
少習經業喜接章逢士下逮庸人孺子見之無不意滿  
若是者屢屢言之蓋以穆為予禮部所舉士雅相知厚  
故耳熟焉君生某年月至某年月壽七十乃卒葬於某  
山之原其封曰翰林院編修階文林郎故人稱之曰封  
君乃按狀以銘銘曰庶以親著卿以子名前千百年曰  
此徐氏之英也封君有子太史有父身所為教以貽於  
後後千百年其亦曰無忝於徐氏之胄乎

封翰林院編修可聞顧翁墓誌銘

予嘗序可聞顧翁事又表厥考遺善處士之墓比翁卒  
厥子清來請銘翁之興況既序之詳矣茲撮其行實為  
銘復序以系之按顧氏本江南著姓蓋自晉已然居華  
亭者若干世翁曾祖秀一以行稱祖文理考顯皆力本  
修行而父德尤著所謂遺善處士者寔生翁翁亦不仕  
治家政及子貴曰吾可以閒矣始有是號後以子官受  
封人猶以號稱既老乃復翁之翁戟髯魁幹顧步有威

意度濶畧而中屹屹負志操處士舊業為外兄沈氏所  
侵弗與校翁曰是先世所遺者其惟我責乃曰於官盡  
反其所侵議者謂處士能讓而翁善守兩賢之家有遠  
役沈度其憚行要重賂為代翁奮自徃卒事還費省十  
三四自是鄉隣無敢侮者相戒曰顧氏有子矣樂赴人  
之急勇不避難解忿釋憾拜於門者踵相接與人言不  
逆詐雖至親過必面折然不留於心明日有善又稱之  
故人畏而不怨治生無詭過鬻貨有弗善直以告人雖

弗售弗計貸不能償者或因以乞之蓋其勤勵儉節寢  
致優裕寔未嘗腴剝為利故凡有興作衆懽趨之回視  
他姓固有強而弗赴者因益以驗翁之賢翁雖無官守  
恒憂人之憂比值歲旱與鄉大夫禱雨徒步走烈日中  
遂得疾疾且革謂諸子姓曰吾今年七十三與吾父同  
壽死不恨獨不及清歸歸則以吾言論之以終吾教云蓋  
清之就外傳也每夜歸翁必課所業清舉解元進士為  
翰林編修翁來視於官及歸始被封清還侍讀以母喪

歸翁乃訓以官事其所謂終教者以此清再入朝在講  
筵史局方以學行嚮用而翁弗待矣翁以正統某年月  
日生正德某年月日卒是年九月十三日葬墓在縣之  
修竹鄉吉麗橋處士墓以厥配陸孺人先翁卒且葬虛  
其半壙至是乃合亦治命也翁生清及某孫某某按  
狀汪編修抑之所撰次而清所自創孺人亦著姓昔所  
謂顧陸者與翁媿德其墓別有銘茲不悉序也銘曰立  
爾卓不摧以弱守爾璞不缺以薄不刻不斷寧我為璞

亦寧我為木不棟以桷我稼我穫其苗孔碩有德與齒  
矧有封爵我憂其劬亦饗其樂我所自取若手諸索惟  
厥子攸託述其匪作

戶部郎中徐良佐墓誌銘

今年春良佐手二軸請予書洞庭岳麓詩辭曰廷用出  
先生門十五年矣而寸紙隻字未嘗有獲知久厥詞翰  
諒不為知者靳予方辭謝良佐意懇甚趣僮僕具筆墨  
必得乃已予自禮闈得良佐後每聞能官聲不意其酷



嗜此殊以為訝越兩月良佐忽遘疾疾急屬其友易吉  
士舒誥欲得予銘數日遽卒不益可訝也夫嗚呼不亦  
可痛也夫良佐姓徐氏諱廷用良佐字也世居吾長沙  
之醴陵祖某有隱德考某某縣丞縣丞君仕不顯嘗指  
良佐曰是必亢吾宗比弱冠遣為縣學生稍長學驟進  
同輩者多屈為弟子成化丙午舉鄉貢其舉進士當弘  
治癸丑越二年丁卯授戶部江西司主事督都城商稅  
通州倉儲及內監諸場芻秣事皆劇務良佐夙夜勤勞

力拒請託貴戚僕隸有牟利撓法者輒舉按之庚申丁外艱闋服癸亥改陝西司甲子都御史閻公仲宇承勅治宣府大同邊儲謂非才識練習者莫佐其事訪於衆得良佐名特奏請以從時芻糧闕乏悉力區畫令不煩而事集歸還廣東司員外郎正德丙寅進河南司郎中凡歷四司皆繁甚比為正郎躬領庶務益殫志慮而官長信任寮佐敬服無少訾議識者皆以遠大期之然愈自刻厲敦尚儉素食飲衣馬不加於舊既在告猶手削奏牘

矻矻不稍置獨念母老欲圖終養竟不獲自遂以歿年  
四十有二而已銘曰固則執之約鮮失之止或尼之吁  
天誰詰之年之嗇矣塗之阨矣維子之克矣家之澤矣  
衡山之巍兮楚水之瀾兮生斯葬斯兮嗟兮其全歸兮

封太宜人何母李氏墓誌銘

封太宜人李氏於故刑部郎中何君商臣為元配於今  
兵部郎中孟春為母以君主事初命封安人孟春初命  
雖不過主事而例從夫貴又以獨存例封今號及見其

子為今官以卒卒五十有八初太宜人歸於何氏年甫十有九事祖母鄧安人姑廖宜人備極孝養喪葬皆如禮成化辛丑君舉進士太宜人攜二子從至京師弘治辛亥君錄囚南畿厥考廷彥公致雲南按察司僉事君遣婦子歸養於家太宜人事其繼姑李宜人如其先姑癸丑孟春舉進士旋遭君喪乙卯以母命娶於歐氏丙辰擢居兵部之職方太宜人就養於官越三年得疾癸亥按察公喪孟春以嫡孫承重正德丙寅復任丁卯李

宜人喪再承重歸太宜人手足半痿又弗良於言孟春  
意揣色候饑飽寒煖隨事致請太宜人必領焉蓋非公  
事不敢離左右嘗考牧三邊數閱月既見則喜見於面  
雖在哀疚恒恃以自適已巳湖南多盜鄉民多走徙孟  
春奉太宜人野避者一入城者五重貽親憂復奉以北  
上比補武選未一月舍館甫定而太宜人疾革時其少  
子孟旦及崔氏女皆先天惟孟春在側云李與何皆郴  
州望族太宜人黔江教諭通之女生景泰壬申六月六

日卒於己巳九月十有四日君葬於劉仙嶺太宜人今  
葬於何山十里而近從吉卜也女之職大抵婦勞而母  
逸太宜人少勤饋饗暨膺祿養又困於牀褥出則涉舟  
車之險殆不能一日安乎其身孟春少劬問學不任家  
務既失怙又值母病形影相依倚聲氣相煦嫗慈孝之  
懿有人所甚難者比其再至文益奇才氣益充拓方將  
自見於用而又抱憂戚以去君子蓋深哀之予雅有一  
日之長尤知且厚乃為其母銘與其父之銘並傳焉銘

曰柳去京幾萬里一從夫三從子官為家古有是全而  
歸更何俟惟母德在堂所葬有銘亦近禮我為文銘再  
世以其餘昭內懿生同居死異地魂必之藏在此

大理左寺正趙生訓夫墓誌銘

趙生訓夫既寢疾予徃視之生感然曰武病劇且歸歸  
幸獲終養惟違遠門下甚恨予憮然感之越數日果上  
疏乞致仕比命下以手書告訣其父且遺囑請予銘初  
生介柳中書文範見予未遇時後直內閣為官屬因學

詩文於予久且習與吾子兆先交最稔悼其死手錄其遺稿以傳茲惡得無情哉生諱式訓夫字也生少聰穎異凡兒學舉子業尤工楷書從徵仕君宦淮閩間弱冠將入郡學以父命綜家務始棄舊習徵仕既歸休日服孝養徵仕謂之曰國家求賢路廣汝無擇仕且無以我故自畫生上京師以儒士隸禮部印局需次未至弘治庚戌尚書耿文恪公廩於官甲寅少師徐文靖公始薦領書翰事試中書舍人三年乃得真授凡朝廷寶冊制



詔勅經筵講章榜文試錄多其手出預修大明會典  
加正七品祿修玉牒賜銀幣修歷代通鑑纂要亦有賜  
歲時所賜酒饌扇袋諸物及御製詩皆郎署所不預嘗  
頒孝宗覃恩詔及孝肅太皇太后哀詔於兩畿諸郡閣  
直出使前此所未有九載秩滿遷大理左寺正加從五  
品祿其視常格亦加一等云生明敏清辯博聞而達尚  
多事遊宦歷覽山川形勝識民情事變使卒業科第決  
不至汨沒既以藝舉專事書牋益精鑒賞真行篆隸旁

及繪畫芙蓉松菊竹兔之類種種清絕每應制揮寫刻  
時立辦遠近購請無虛旬日碑板摹刻後先輝映評騭  
品第有指不能多屈尤擅越調酒酣對客撫几歌吟綽  
有風致生沒後士大夫家殆為絕響予於是蓋永歎焉  
生生景泰某年某月日卒以正德某年葬於吹臺山竹  
臯之南疾草時族戚為治後事集諸鄉宦緘所藏書畫  
諸物待其子君澤來昇之君澤亦析其貲以遺幼弟皆  
可謂不負者銘曰有穎在囊不探而脫見爾豪拔試爾

硃發持以嚮用孰爾鋒遏匪武斯競乃文之爵彼崛而  
突胡奄而忽維中書君未老而折才孰爾予命孰爾奪  
嗟哉趙生飲志而沒

明故推誠宣忠翊運武臣特進光祿大夫柱國  
慶雲侯贈宣國公謚恭和周公墓誌銘


孝肅貞順康懿光烈輔天成聖太皇太后既崩之五年  
為正德戊辰其中弟太保長寧伯或卒越明年己巳二  
月十日伯弟太傅慶雲侯壽亦卒上屢為震悼輟視朝

一日贈長寧為侯謚榮禧贈慶雲為宣國公謚恭和進一等遣禮部官諭祭命有司治葬事焉公姓周氏壽其諱字永齡世居京之昌平曾祖諱德清祖諱福山皆贈某官考諱能贈某官謚榮靖妣甄氏贈寧國夫人生女二太皇太后其次也繼配高氏亦贈寧國夫人實生公公少奇俊不凡性度詳雅寡言笑讀書通大義天順癸未襲榮靖初命為錦衣衛副千戶尋進左軍都督府都督僉事成化乙酉進都督同知丁亥賜誥券封慶雲伯辛丑進慶雲侯

弘治戊申加太傅蓋自爵命以來日益貴盛其所被賜  
不可勝紀公禮賢下士雖接幼賤亦假以辭色終太皇  
之世不敗恃恩澤為驕縱雖例不治事嘗奉使藩府印  
記戰馬皆以勤慎見稱朝請之暇必躬蒞家塾課諸子  
書史筆畫未嘗輕出門戶客至刺入非親舊不輕引接  
以為常縉紳簪弁之徒或有不識其面者焉然則太皇  
陰覆之仁累朝報本推恩之孝於公見之而膺奉持守  
不危不溢以衍於無窮者公之賢亦可謂無負耳矣公

生正統壬戌六月八日壽六十八卒之年三月二十八日寔於昌平鸞臺山祖墓之次公以治命屬二子奉狀徵銘銘安可辭哉銘曰霽彼慶雲為瑞於天地有封邑嘉名應焉鍾靈蘊和亦有人瑞寧國之子聖母之弟若雲從龍自下而升而朝布韋而暮簪纓五爵之二三公之一一門兩封此實誰匹歷事三朝餘四十年我皇眷之惟親惟賢榮名寵光越有終始生斯葬斯於帝之里鸞臺之鄉裕陵是望山環水朝靈氣攸藏穹碑我空上有

文字公子公孫來者是視



懷麓堂集卷八十八



欽定四庫全書

集部

懷麓堂集卷八十九至九十一

詳校官監察御史<sub>臣</sub>范衷

中書<sub>臣</sub>劉源溥覆勘

總校官編修<sub>臣</sub>王燕緒

校對官待詔<sub>臣</sub>胡士震

謄錄監生<sub>臣</sub>吳人麟

欽定四庫全書

懷麓堂集卷八十九

明 李東陽 撰

文後稿二十九

誌銘

明故通議大夫吏部左侍郎兼翰林院學士掌  
詹事府事張公墓誌銘

嗟乎東白公已矣公姓張氏東白其所自號竟以號行

天下皆知有張東白者而今已矣嗟乎公五歲精爽過人書過目成誦其父松亭翁名之曰文魁寧靖王召見令作儷對韻語大加賞歎書元徵二字賜之因易名元徵松亭携入閩觀者塞道公至考亭拜朱晦翁遺像輒有志所謂道學者松亭謂曰彼儒先曷嘗不由科舉進邪乃入南昌縣學為生都御史韓公雍奇之曰此人瑞也復易其名曰元禎字之曰廷祥天順己卯舉鄉貢庚辰試禮部得詩魁英宗每掄材必兼觜幹公貌癯然若

不勝衣李文達公特簡為翰林庶吉士劉文安公奉詔授業見其文矍然以驚壬午授編修考校精覈歲貢士鮮入格者癸未同考禮部得太倉陸鉞為省元人始未信後果有大名憲宗即阼上疏請行三年喪復言講學聽治用人厚俗四事預修實錄書法不苟時同官多不合者成化丁亥謝病歸示無復仕進意名益重從之遊者四遠而至藩臬郡縣至者未始不往見見則憮然自失諸言事者累薦起之不果居二十年值孝宗即位弘

治戊申召修實錄至則以舊勞遷春坊左贊善上勸行王道䟽幾萬言入侍經筵己酉考南畿鄉貢辛亥書成遷南京翰林侍講學士癸亥念母老復謝病歸越五年戊午召修大明會典為副總裁至復遷翰林學士掌院事孝宗隆其名特置日講兼侍東宮講讀數月以母憂去壬戌擢南京太常寺卿癸亥召修歷代通鑑纂要改太常卿仍兼學士侍日講甲子命掌詹事府事乙丑考會試即奉詔授吉士業一日忽上䟽請讀太極圖西銘

諸書上亟索內閣得之盖有意大用未幾而龍馭上賓  
矣今天子繼統以侍從恩擢吏部左侍郎仍兼學士加  
從二品俸勅為實錄副總裁自是數病病必連月屢上  
疏乞致仕優詔弗許正德丁卯滿三載未奏十二月晦  
日卒公少侍父疾顰天請代喪禮尚古事母色養惟赴  
召時不及躬斂憾之終身遇二弟有恩嘗建一莊歲置  
租二百石以濟族邨以四百石貸鄉民有司為給帖書  
籍其於書務博涉尤好探經傳蹟隱多所獨得一時談

理學者數人各樹門戶而公岸然不為下作易詩春秋語要四書集要太極圖說要綱目近思錄家語解要皆未脫稿為詩文始務奇崛勇脫蹊徑晚就平實若出二手然類為人所重莫為軒輊論議揭揭尤深嫉惡至不可近及再入宦途益寬厚雖後之寒士亦與抗禮顧或為貶抑要其中容有所見賢者之不可測固如此天每艱於生才才者未必用有如公者豈易得哉豈易得哉公生於正統丁巳某月日年七十乃卒其子詣予請銘

公亦宣易銘哉銘曰木生在山久乃益堅輦致於途蹶萬牛以顛貢之明堂將棟將梁忽內蠹以傷孰其生之而卒棄厥良人材實殊公負其有惟厥攸負曰可與大受與不在天受不在予夫苟不自愧遑卹其餘維文之絕維名之揭彼利達者疇巧疇拙地靈人傑惟鄉邦之哲百世之下山不泐水不齧茲惟張東白公之穴

明故錦衣衛掌衛事都指揮使贈榮祿大夫右

軍都督府都督同知葉公墓誌銘



公姓葉氏諱廣字大用世錦衣衛為總旗公少孤賴母  
范夫人鞠成之俾學書藝既代役識者曰是非行伍中  
人領東廠緝訪事詳慎不泄成化八年以功擢試百戶  
涖本所事屢奉勅出勘重獄所在餽贐悉辭弗納江西  
藩臬賦詩贈之遼東武臣奏其地有金鑛珠池公奉命  
往勘躬涉境外察其姦事遂寢東人德之至今領本衛  
緝訪事事必核有劇盜詔捕甚急或陰跡所在以告公  
曰盜固有罪待其自犯爾何得為邏者後自訪得之有

校尉緝越城盜公疑之執不變公曰若殺此人後獲真者奈何不數日真者果獲二十一年實授為百戶明年遷副千戶理鎮撫司刑鞠讞精密有姦婦掣毒假婢手中其夫概坐死公以婢不知情辯釋之有校尉誣執平人為盜反坐執者都察院守者相仇殺逮繫百餘人戶部進內藏銀數失實繫者亦衆皆止坐罪者自餘平反縱釋多至不可計弘治五年擢署指揮僉事明年本銜缺員兵部薦其名時孝宗簡在已久御文華殿親閱之

命涖衛事實授為僉事總都城溝涂事人不敢犯出勘  
寧化王府疑獄務存大體勘大明川投獻地卒歸於民  
督捕中外盜賊獲數千百人而鄭村壩賊尤劇數年累  
遷都指揮僉事北山賊稱靠山王者勢甚獷方發官軍  
出捕比至則公已遣官屬擣其巢滅之一日矣上偉其  
功遷都指揮同知又勘外戚莊地及藩府儀賓獄皆集  
事而還今皇帝正德元年進都指揮使掌衛事凡郊祀  
耕籍視學經筵諸大禮無弗預者減役從省浮費政令

一新官屬皆改視易聽總緝紡事尤極慎重戒諭官校  
必以天道國法為說詞義懇切人多感動蓋隱然有陰  
德焉八月二十五日卒於正寢距其生正統三年七月  
二十三日壽至七十朝廷特贈榮祿大夫右軍都督府  
都督同知命禮部諭祭者三工部治凡葬事皆異數也  
公器局魁碩敏而能斷遇事不苟動先自律威貸旁午  
屹然不為動自壯至老未嘗少易又能體悉羣情不過  
苛刻用是獲於上下交口贊譽翕然同辭其卒也尤悼

惜不置云銘曰有偉丈夫奮起朝列在帝左右職掌麾  
節使旌子子出徧藩臬命不我辱物不我涅嚴嚴詔獄  
法象斯設鞠明察幽靡枉弗雪衝飈激濤盤根錯節如  
櫟得濟如觴解結隨不失正剛不至折功名始終竟保  
完潔高門截巢永樹闕闕外有佳城幽光不滅

明故武定侯郭公墓誌銘

郭公存忠自錦衣衛指揮僉事襲封武定侯越七年卒  
上輟視朝一日命禮部諭祭者三勅有司治凡葬事皆

如制公之為僉事也嘗試武舉有名然未甚顯會錦衣  
闕員兵部以公數人名上孝宗御文華殿親閱之見公  
儀觀秀整進對明暢命涖衛事每侍衛扈從必以目屬  
焉嘗參預廷鞫總都城溝涂事兼督工修治充殿試執  
事官出勘長沙衛獄詞涉藩府歸奏稱旨其為侯也僉  
右軍都督府事領京營牧馬勘薊州牧場地捕北山賊  
屬若干人敵寇大同命充右參將尋命簡京營兵別部  
以俟公易置旗鼓嚴為肄練勇氣增倍後不果行乃上

邊務六事累數千言都御史陳公道韓御史春交章薦之各極稱譽亦未及試也公雖生故家值業中落囊無餘貲惟積書數千卷凡天官時日戰守攻圍之法悉有指授以至堪輿醫卜罔不究心公暇則詠詩作書開園蒔花尤好竹以賓竹自號大夫士過者談論窮日夕不厭也事母致孝友誼尤篤貧而死者為具棺斂人以此賢之獨其中所蘊蓄弗克大展齋志以沒識者又以是惜之公生景泰甲戌某月某日卒于正德丁卯六月十

六日年五十四其葬則十月三日也子勛奉公治命請  
予銘銘曰郭有封國在高皇世一門兩侯侯者再繼仲  
繼以恩伯繼以功三紀之後歸於大宗翼翼京營嚴嚴  
督府既衷壯猶亦佐耆武維時恬熙兵斂弗耀志在邊  
疆身則廊廟謂公既試而有遺才公子公孫繼繼其來  
附於先公是謂無忝幽光百世昭不可掩

明故山東萊州府知府進階亞中大夫致仕李

君墓誌銘



君姓李氏諱榮字從質其先望於隴西元季有諱成者  
居鳳翔國朝永樂中徙河間之任丘考諱溥登陝西鄉  
薦累官山東東昌府學教授贈儒林郎光祿寺丞生四  
子君其長也生而凝重不浮儒林公邃易學歷湖蜀秦  
魯間多所造就因以授君君補縣學生提學閭御史禹  
錫賞所為文試必居首遊從至四十餘輩任丘士多業  
儒傳易者實自君始成化甲午舉京闈戊戌登進士知  
上海縣賦訟叢沓持以鎮靜和而不狎每有鞠問人稱

為明以外艱去民遮道攀送有下泣者服闋被徵擢光祿丞越六年當弘治壬子遷少卿六年戊午擢知萊州府值歲屢歉撫煦凋瘵理疆界均力役捕刦盜六千餘人時勾稽屯地戎衛欲移患於民或議牧馬於萊又有獻地於衡藩者皆力爭以免招徠流徙與屬縣期約視多寡為殿最旬月內復業者至數千人民稍饑輒發粟施粥活者尤衆暇則修葺學舍集諸生勵以行業萊人為刻石頌德焉越八年不調君以子時已舉進士為翰

林編修乃上疏乞歸吏部言其恬退可嘉宜進秩以示  
勸特陞山東布政司右參政致仕明年得疾就醫京邸  
數月歸又明年病劇時亟欲歸省會孝廟實錄告成有  
日又朝廷將行黜陟之令君手書止之自制棺斂處分  
家務曰無以為我兒累也時憂甚弗暇他卹亟具疏以  
請踰月乃獲命比抵家君已逝七日矣君夙敦孝慕每  
見儒官輒加禮遇曰吾父嘗為是也世所遺田宅悉讓  
諸弟羣從子女皆為婚嫁處已慎密澹然無所利有治

事才而為寬厚所掩又恥自銜故鮮有知者時亦用家  
學顯才器甚偉所進未可量歸省事尤汲汲若弗逮竟  
弗躬治命其志尤可哀也自狀父行以墓銘告銘曰駕  
於亨衢既蹶復驅弗摧我車颿彼中流倏退以休式完  
我舟尺蠖之屈冥鴻之揭非我失得彼逐逐者其欲其  
舍無一非我得不在于身有天者存以遺我後人

封孺人彭母李氏墓誌銘

婦職視所從為貴賤然事在兩值或兩值而一貴者蓋

亦有遺寵焉彭母李儒人之封實以大理寺正君諱銓  
初命為評事其子縉累官禮部員外郎秩加顯而封號  
未及進故仍稱孺人而以先封故不得稱太制也李氏  
出襄陽舊族與彭為郡望孺人之父諱濟以國子生為  
同安縣丞有惠在人寺正君之父贈評事真朴翁諱某  
聞李氏女賢聘以冢婦同安亦耳熟寺正君之才簡於  
諸生謂為偉器議是以克合孺人孝敬勤儉皆出天性  
服食麤糲而奉祀修饋必豐潔嫺里窮乏有須輒應俯

接卑幼無不意滿以去內外賢之生縉未彌月出事井  
曰手為杵所傷裹以供役翁責羣幼弗代孺人謝曰婦  
職固是也寺正君舉鄉貢擢進士第既授官孺人貴不  
廢業寺正君嘗賑饑齊魯間蠲逋發陳招集流徙夙夜  
不暇給孺人留京邸勤家政內外截截君子以為有內  
助焉寺正君還朝道卒孺人哀毀幾不能生既歸葬壹  
意教縉市織紡為膏火費縉繼舉進士授萊州府推官  
孺人實就願養每訊獄聲徹屏幃輒為廢食飲縉歸必

問之故徃戒之曰汝父之為是官恒自慮獲譴及出賑活人多甚吾知其必有後也汝無亦為後地乎縉被召為兵部武選司主事孺人復至京邸後數年改禮部再命至今官而孺人歸已老不復出矣正德三年戊辰五月八日卒於家壽七十有四子三人縉其長縉子禮部所舉士也勤慎奉職不愧其父其徵銘也甚懇而哀吾是以銘銘曰得於夫者以成其子優學為仕平反為理復為禮官內則之軌惟所從故以與終始有藏在茲百世

無毀

蕭芝菴墓誌銘

芝菴蕭君來自南實以子昂居京師就養五年乃卒已而厥配潘孺人亦卒昂將歸合葬奉兵部郎中李君源狀請予銘按狀蕭氏本蜀望仕宋居河南從南渡寓於閩國初有伯亨者嘗被召以疾辭不起賜歸錢塘給薪米數十戶終其身是為君祖子敬號善寧居士隱於鄉是為君父君諱鑑字克明芝菴號也生而端慤長益謹



厚寡言笑不喜戲劇遇事輒奮欲自立時家中落畫為  
蠱幹夜歸誦讀不絕口業寢就裕事親志養婚弟嫁妹  
為從子置田宅育諸甥如己子友有黃佐者同質於外  
各市官鹽若干引至洞江黃舟壞鹽盡覆君公所有予  
之黃負金為所窘君亦代之償黃謝曰微公佐死久矣  
分水縣學生郎啟親喪不能葬君貸以漆山田十畝并  
其券折之杭州衛百戶杭華代職京師貧不自活君給  
以衣食復資而遣之其他周困振乏者尤衆晚好醫書得

其突與以疾告者雖天寒暑必赴酬以金幣輒辭曰吾  
豈為利計哉鄉人無長少䟽戚皆以號稱之曰芝菴長  
者也孺人同邑橘泉處士之女有淑質慧敏精女事能  
讀列女傳諸書比歸禮佐孝養治內無違則君喪哀甚  
忽夢君因大慟幾絕越數日竟不起惟昂一子以名醫  
被徵入太醫院供事內局比以進藥功擢御醫命下君  
已卒七日而孺人猶及見焉明年庚午三月三十日合  
葬於西湖廢井之原故為銘銘曰蕭出內江始遷洛陽

由閩逮杭廼居錢塘其業經書其術岐黃父教之良矧有  
義方老家於官全歸其鄉子職之勤矧惟顯揚龍泉之  
原山迴水長居也同堂寔也同藏有存不亡百世勿忘

明故封奉直大夫翰林院侍講學士劉公墓誌

銘

封翰林院侍講學士劉公諱規字應乾舉成化己丑進  
士知浙江餘姚縣以父喪闋服改知湖廣麻城縣被簡  
為監察御史左遷廣西鬱林州判官孝宗皇帝登極復

叙遷為江西新淦知縣以母老上疏乞歸養例弗許時  
其子春已為翰林編修會上兩宮尊號恩當封乃棄職  
就封秩為編修階文林郎暨今上皇帝登極復以兩宮  
尊號恩進封侍講學士階奉直大夫壽七十三卒正德  
三年九月十四日也公性剛介不為物撓在餘姚出納  
興革心計力作聞海堤圯亟為修築患里甲苦供役手  
自藉記令里日出米二石餘則均於次日日省數倍重  
興學士經獎勸者多有名於時每賑饑必審實里戶高

下以次給之民獲實利治獄必先矜恤隨事斷決不輕械繫而徃徃得其情狀病勢家請託每客至延坐後廳令羣吏左右侍皆莫敢出口以去然亦無怨也按察蕭僉事禎有戚屬出入為需索公械送於蕭蕭謝之遂用是知公麻城差易治治又加昔故不勞而辦為御史覈湖廣貴州軍儲又按山東雖擿發姦伏而務平恕每慮囚獄疑者必從宥法効叅政張盛為所註補外未嘗色悔焉痛早失怙事母每飯必躬侍建家祠修世譜周贍

貧族至老不倦蓋其居官不苟得而家積穀粟益饒裕  
其為義舉以此尤嚴子教每語之曰居者為孝仕者為  
忠又語其仕者曰爾輩各有職職異而理同爾其識之  
長子春舉解元進士及第累官至學士賜四品服以學  
行聞台亦舉解元進士歷吏部員外郎今為泰州同知  
孫鶴年復舉進士彭年舉鄉貢士科第之盛鮮與為比  
其次曰靜年大年嘉年延年光祖繼祖萬年皆宜人鄧  
氏出學士君在講筵史局方嚮用聞訃將歸卜以明年

某月某日襄事奉狀請予銘銘曰邑不我誣臺不我矜  
旋復棄之封君是稱科以三世教以一經矧有世守有  
行有名公名固存奚俟茲銘

光祿寺少卿致仕進階朝列大夫李君墓誌銘  
去年冬予會抱犢李光祿南屏潘太史遂逸張西臺於  
家三君者並京產潘張皆予姻家李君亦少同筆硯張  
氏之好實與成之故也時李君已病歸遂劇越數日手  
書抵予若欲為永訣者既又以韻語屬予銘墓比再遣

人候之則已逝矣予既與遂逸會哭春初有事於城南  
是夕夢焉乃悲而銘之李氏世居徐之沛縣後徵至京  
師隸錦衣衛籍君諱紳字縉卿其自號曰抱犢山人生  
而朗潤數歲能屬對人爭誦之嘗與予從監察御史岐  
山展先生遊並被甄賞君長子三歲顧淹一舉舉成化  
乙酉鄉貢連擢丙戌進士授行人司行人數奉使足跡  
遍天下聞見益博九載考最遷戶部員外郎郎中贈其  
父道明員外郎封母周氏為太宜人並受誥命其所領



司最劇書簿立辦時貴戚方盛有所干請力為推抑尚  
書李公敏薦為光祿寺少卿意氣勃發遽罹猜忌會考  
覈京朝官以浮躁淺露例調知山西之忻州忻君所嘗奉  
使地不欲往上疏乞致仕再上未允復疏曰郡縣之職  
非循良豈弟者弗稱茲以浮躁淺露之名而責其循良  
豈弟之政盖亦難矣既得請榜於坐曰五斗懶將雙膝  
屈三章乞得一身閒論者賞其志亦惜其才之不盡見  
也君舊居城南徙禁禦之西偏已乃復故業間歸沛置

屋數楹歲取僦直忽燬於火又無他貿易歲費且不給  
持以勤儉未嘗見言面喜讀道書手自抄錄至盈箱篋  
或訝之笑而弗答與客觴詠投壺象戲或雜以諧謔文  
采逸發獨不及官府事予叩之琅琅可聽使得再試未  
必不蘄然穎脫也今天子登極詔進階朝列大夫至是  
卒嘗為友索草書久弗致續未屬三日以幅楮抵予必  
得乃已交接之際蓋至死不易云銘曰少而同袍壯而  
同朝分官異曹獨老於韜豈才弗能實命不遭觴予於

堂弔子於郊銘以葬之以全我交

贈叔人孫母錢氏墓誌銘

戶部尚書孫君志同之父之喪予嘗為作銘及母錢氏  
喪銘弗及備意有所待也越十有九年自述行狀二千  
言以請予讀既歎曰世所述先德有能詳且實若是者  
乎按錢氏出鎮江丹徒祖忠謫戍湖廣始居安陸與孫  
同里聞父廣於素菴翁雅厚遂許聘其子資政公孟恕  
逮事舅姑並致孝敬體素弱始不習勞聞姑戒躬率婢

使至窮日夜舅老病嗽晨起須茗飲淑人每夙興製茗  
姑喜肉炙躬執炊爨暑必近火自始嫁至垂老饗饋如  
一日親喪以舅姑在不敢過哀私居縞素定省必易服  
從事公性嚴肅雖細事必稟而後行有所怒則為寬解  
家法不置乳母生五子六女皆自抱負紉綴至得婦乃  
已素好潔祭饗器必自滌每澣絺葛立夏日中以手熨  
抑俾燥濕得所用不殄物衣雖久不垢敝裁翦繒錦不  
遺餘質積至數千片輳合補葺五色間錯粲然成文公

弟妹七人處以和嫗不失辭色外睦兄姊孤且貧者遇之尤厚以暨諸嫗戚皆然鄰婦死無棺假以佳木鄉黨患難亦周之以成公志公嘗謂曰吾婚嫁粗畢夫婦當偕老脫我得多筭則願分以益汝無相先後錢少公一歲後一年卒皆壽六十有一錢始封安人進宜人贈恭人淑人至夫人而公亦加贈如志同官資政者尚書階也戶部以郎中歸省而公喪在弘治甲寅歲踰年而夫人亦卒是為乙卯正月十有一日十有二月二十有九

日合葬雞籠山之墓異棺同槨乃戶部所親製以義起者蓋於是寡遺憾焉嗟夫女德不外見若戶部之孝且文能自紀述則雖磬歛跬步之細皆身教也由是叙銘之以與父德並傳顧不可哉銘曰有子如此無問其母以柔濟剛惟嚴教之輔惟德是似質固其有有潛弗彰澤故能久惟栝棖在口若書在手同堂合壙終獲其所我銘封石若俟其後

懷麓堂集卷八十九